


AHEPERI,

EKAPIITULU YA NENLI ²

 ...orimoorwa toko, khusoma Soolempwa, wira owerye olikanyiha ni wira oone sinto yaari Ekeekhai wala nnari. Owo aahikuxa, Ekeekhai, ni Waataana Wa Khalayi. Vano, Paulo aari musomi a Waataana Wa Khalayi. Akavi ansuwela yeeyo? [Muthukumano oniira, "Amen."—Mol.] Owo aaxuttihiwe ni mmosa w'asuweli a mahiku awe, Kamaliyeli, musuweli oosuwanyeya. Ni Paulo aanisuwela Waataana Wa Khalayi. Ni kinoona wira etuthuwelo awe yoopacerya, ntoko sihimaly'aka voosiis'ula, okathi aakhalely'awe oxaahiti okhwa wa Sitefano. Etthu emosa yaahaana wira yanvanre Paulo, okhala wira soolepa sawe sothene owo aatthikela ahimyaka yeeyo, "Miyu nkiphwanenle, okhala wira kaahilupattha Ekereja mpakha owiiva. Miyu ka mwaamukhaani eriyari aya."

⁹⁵ Oh, masi Muluku aarina muupuwelo woovirikana n'uwo. Owo aari mulopwana ooweryexa a mahiku awo.

Mmoone Paulo Oowaarya, murummwa
muulupale
Ni ekuwo awe yoowaarya ni yooreera,
(namalepa oohimya)
Oh, vekeekhai onookhala okhuwela
Hiyo othene nakumana-ru Iwe.

Nihiku nle nuulupale okathi onrow'aka omoona waakhela ekhara ya namukhwela waamini, otthuveliwa wa namukhwela waamini!

⁹⁶ Miyu kaaheemela vanipuwani naamukhaani, mmo woohikhala khalayi, vaavo owo olempy'awe Iwarakha iya. Vano nto khuhitiwa muru awe. Numala khimurihela musarxeetani, wira orowe attharaka esarxeeta yeele ya itthu soonanarasa. Nto muYuta ola vale, owo iirale, "Kookhalana mw'erutthuni mwaka mirala sa Yesu Kristu. Koowanana maxeni owEfeso, masi koowana ekhotto yooreera. Koomaliherya muteko aka. Koosuka Waamini. Okhuma vano, koosukeriwa ekhara ya xariya, yeeyo Apwiya, Mphuki a xariya, antthun'aya okivaha Nihiku nenlo. Nto kahi miyo paahi, masi othene ale aniphenta orwa Wawe." Oh moota enkisivel'aya eyo! Oh, kintthuna kaalakiwe vamosa n'awo! Hiyo naaniipaka nsipo nimosa:

Oh, munimwaalakiwa munikotoni mw'Awe?
Munimwaalakiwa munikotoni mw'Awe?

Muhikhalane nlepa, mukhale nwehaka ni
mulipelelaka woona niira nle;
Owo onnoorwa-tho.

⁹⁷ Kintthuna okhala mmosa a yaawo. Vano mulipa-oolepa onkelela ohoolo, airaka:

*Tivo nihaana wiivelela...oratta-ene itthu
siiwaly'ahu, wira ohikhale okathi onrow'ahu ohiya.*

⁹⁸ Ntoko siixuttihaly'ahu yeeyo, voosiis'ula, versiikulu 2 enihimya, "Vakhala wira..."

Vakhala wira ehapari elaleiwe ni malaikha...

⁹⁹ Hiyo nimphwanya wira malaikha t'ani? Maprofeta. "Muluku aahilavula khalayi..." Vano, nyuwo muhaana okhaliha, kahi ankhili ahu yoohi, masi Bibilia. Vano kapiitulu 1, ya... kapiitulu 1, versiikulu 1.

Muluku, khalayi...aahaalavulia ni inamuna sinci-ene...axitiithi ni moolumo a maprofeta,

¹⁰⁰ Vano owo onoorowa va, ni wira-tho.

Maana ehapari yaalaleiwe ni malaikha yaahilipiheriwa,...

Nto *nlaikha* nnihimya exeeni? "Namiythaka." Muluku amuttikitthelaru namitthaka...Vano nto hiyo nakhalaru ootikittheliwa, hiyo ninkhala anamiythaka a Muluku. Hiyo n'anamiythaka wa olumwenku, namuhupi a Wirimu, nihimyaka wira hiyo n'anaweetta ni amalapo. Khanihyo a olumwenku yoola. Masi nimphavela Muttetthe mmosa onrwa, yoowo Namateka ni Namapaka okhanle Muluku. Hiyo khaninthukumanya mihakhu vathi va, vaava anawiiye vanipwexaya mukhora, ni oweexe, mukwitha, onihonon'aya. Maana, mihakhu sahu siri Wirimu, weiwo Yesu okilanth'awe moonoo woolopwana wa ole Oowerya. Oh, etthu xeeni yoovuwa ni yooreerexa, osuwela wira:

Miroromelo sahu khasilimpe hata vatthu
Woohikhala Ephome ya Yesu ni exariya;
Okathi sothene sinrukurerya munep'aka
simmor'aya,

Vano Owo ti nrromelo aka ni nlipiheryo.

Mwa Kristu, Mwala woolipa, kinnilipa;
Itthaya sothene sikina mihaava sinkomowa,
Itthaya sothene sikina mihaava sinkomowa.

¹⁰¹ Moota Eddie Perronet aalepaly'awe nsipo nlo, okathi wo olupatthiwa!

Vano, *vakhala wira ehapari elaleiwe ni malaikha yoolipiheriwa,...*(Okathi namiythaka a Muluku aalavunly'awe Masu, Awo yaahilipa)...ni khula etthavelo *yaahaakhela elivelo aya yetthuwo;*

Hiyo ninrowa otthyawa sayi vano, naahimwiiwelele Kristu, Yoowo onlavula okhuma Wirimu?

Vano nwehe.

Hiyo ninrowa otthyawa sayi, naanyoonyeriwaka woopowa wuulupale; ... (Nkuupuwelani yeeyo)... weiwo opaceriwe olaleeriwa n'Apwiya, ...

¹⁰² Kristu oopacerya muteko Awe. Owo iirale exeeni? Hiyo nimmuweha Yoowo, moota Owo...oowiiyeviha, oomaala, moota Owo ahaary'awe mutthu oosuweleya muulupale ntoko teyooloku. Masi Owo aari oowiiyeviha, oomaala, ooreera murima. Owo khaari mulaleyi a ikuru. Nsu Nawe khaniwiwa mphironi.

Masi Yohani aahrowa ntoko kharamu onikhuluma. Owo aari mulaleyi.

¹⁰³ Yesu aahirwa, kahi ntoko kharamu ookhuluma, masi Muluku aavara muteko ni Yoowo, alipiheryaka Masu. Muluku aari ni Kristu. Petru aahihimya, Nihiku na Pentekosite, "Atthu a Isarayeli, ni nyuwo munkhala oYuteya...Yesu a oNasareti, Mutthu aakupaliwe ni Muluku eriyari anyu, ni ithoonyeryo ni sootikiniha ni miiriirya, Muluku sipakaly'awe muhina mwa Yoowo, eriyari anyu nyuwo othene, mukhanly'anyu anamoono." Nkawehani moota aavitikelenly'awe. "Nyuwo mwaahaana omusuwela Owo."

¹⁰⁴ Yesu iirale, "Nyuwo anawoothe." Khwira, "Nyuwo munnikhuma ni oweha nsuwa, ni nyuwo...Ti nooxeerya ni nooriipela, nyuwo muniira, 'Olelo enoorupa epula.' Nto nakhala noowaarya ni na nsuwa, wala siiso, muniira, 'Ninrowa okhala nihiku nooreera.'" Khwira, "Munniwerya otaphulela makhalelo oosulu, masi ithoonyeryo s'okathi, khamunwerya otaphulela. Maana mwaakisuwenle Miyo, mwaamusuwela nihiku Naka."

¹⁰⁵ Oh, moota aarow'awe okhuwela ohiy'ula. Moota Eroho Awe enkhuwel'aya mwa alaleyi Awe, "Okathi ori vakhiviru!"

Hiyo ninnitaphulela. Ninniweha ikapwitthi s'atomu. Ninnimusuwela t'ani onrowa okuxa opuro wa Clark Gable, ni t'ani onrowa wira *ela*, *ele*, wala *ekina*; wala t'ani onrowa okhala muranttela a mukhulupale. Hiyo nincaliwa ni yeeyo, masi khaninwerya otaphulela ithoonyeryo sa okathi. Hiyo nri woomalelani.

¹⁰⁶ Exeeni iyo? Hiyo khaninreere ocaliwa ni, "Mpantte xeeni ontharelana wa etelevisawu? Susie onrowa wira exeeni?" wala muthiyan'ole nsina nawe ti pani. "Ni Arthur Godfrey onrowa woowi? Enamuna xeeni y'eperwa owo onrow'awe ohimya okathi ontharelana?" Hiyo, ntoko muKristu, ninoosariha marove mmuruni mwahu ni ikokhola ntoko iyo, okathi waatthuneya okhala nivekelaka nipuro nlo, ni omusoma Bibilia, wira nисуwele ithoonyeryo sa okathi onkhal'ahu.

107 Etthu eniriha eyo, imaara sinci-ene, sinkhala ipulpitu sootteettheya, ti yeeyo, sihinkela vathi ni oruha Ekeekhai ya Ehapari yooreera. Ninoorowa waakhula mwaha wa yeeyo mahiku anoorwa. Nihikhaleke oonyonyeriwa hat'etthu. Nto atthu, ntoko hiyo va muTapernakulu Branham mu, wira noone ithoonyeryo ni sootikiniha, ni oweriya wa Kristu ohihimunwe; vano nto osuwela wira ninhelela oka—okathi ahu itthu sikina, ni onyonyeriwa wiiwa Nsu na Pwiya Yesu, “Ninrowa otthyawa sayi, naanyonyeriwaka woopowa wuulupale siiso?”

108 Versiikulu 3, ahiiso versiikulu 4. Ti vaava naamalenly'ahu, versiikulu 4, voosiis'ula.

Nave-tho Muluku onnikhalela onamoona... (Oh, wulu!)

Muluku... onnikhalela onamoona...

Nwiriyane Masu.

...ni ithoonyeryo... sootikiniha, ni miiriirya sinci-ene...

Miiriirya *sinci-ene* exeeni? *Sinci-ene* exeenii? *Sinci-ene* enihimya “soowaatta.” “Ni miiriirya *soowaatta*, Muluku ookhalela onamoona.” O Muluku! Kinroromela wira kinookeliha Eyo muhina mmurimani mwanyu. Nwiriyane.

109 Miyo ki mmosa a mapastore anyu, ni Munna Neville va. Kintthuna wira nwehawehe Eyo. Biblia ohimnye wira, “Akhumelela mmosa eriyari anyu, n'uhimya *elexe ni elexe*, vano khuiiraneya, muhiwe, maana Miyo nkihimnye. Masi owo aalavulaka mwa Nsina Naka, nto enlavul'awe khwiiraneya, vano mwiiwe Yeeyo.” Amen. “Maana Miyo kiri ni profeta owo, wala mulaleyi, etthu p'itthu. Enihimya'awe yairaneya vale, vano mmwiiwelele.”

110 Vano, apatthani, nrowe nimwiiwe Yoowo, Eroho Yowarya enlavula eriyari ahu, yooniheryaka miiriirya sinci-ene, ni ithoonyeryo, ni sootikiniha. Nrowe nihivire vasulu va Yeeyo ntoko sookhumelela soolimaleleya paahi. Nrowe nuupuwele wira Ti Yesu Kristu, mmosaru nsana, olelo, ni mahiku othene; onlipiherya Masu Awe. Nihaana wira. Oh, xontte mwiire. Mwiwelele. Etthu p'itthu ekena ekhale ya nenli, hata etthoko anyu, aiy'anyu, amwaar'inyu, an'inyu. Enakhaleru etthu p'itthu, muhele va nenli. Mmukhalihe Muluku oopacerya. Nyuwo muniira, “Munna Branham, vasulu v'an'aka?” Vasulu va khula etthu. Mmuhele Muluku oopacerya. Mmukhalihe Owo oopacerya.

111 Eliya aahikhuruwa vamwaako, nihiku nimosa. Owo aari nlaikha, namitthaka, namitthaka a Muluku, oottikittheliwa. Nto aahimphwanya muthiyana mmosa naamukhweli attottaka ithaatu piili. Owo khwira, “Murowe, mukipakele mukatthe mmosa mwaamukhaani, ni mukiruuhele maasi oowurya.”

112 Nto owo khwira, “Munep’anyu okhanle mukumi, kirina mikatthe soophiyerya, ahiiso etriku yookhattiwa vakhani, wira kooxe mukatthe mwaamukhaani. Ni kirina makhura aniphiyerya wira kirowe, katakanxe, wira nimalihe. Nto kinttotta ithaatu piili.” Enamuna emosa ya khalayi yaari, yaari enamuna y’aHinti, yo wiikimanyiha ithaatu ni opattiha varyiyari, ni othikela epurulelaka-vo. Koopattiha mooro siiso vanci-ene. Khwira, “Nto kinrowa wooxa mukatthe yoowo mwaamukhaani wa miyo ni mmiravo aka, mwan’aka. Nto ninrowa okhuura nikweeke.” Waahikhala mulakha mwa miyaakha mirarau ni miyeeri mithanu na mosa, ehikhanle maasi hata nipuro.

113 Profet’ole oolipa, a khalayi, aahinweha muthiyan’owo wiitho. Owo khwira, “Murowe, mwakipakele miyo toko.” Yooruma xeeni, ya mulopwana omuhimeerya muthiyana naamukhweli, aakhwa etala, wira amulyihe yoowo toko. Owo aahimye xeeni? “Tthiri SIISO ANIHIMYA T’APWIYA, mwaapu uwo khommala-mo, nnakhala murinki khonuuma, mpakha Muluku orupihela epula mulaponi.”

Yoopacerya Muluku. Owo aahivolowa khupaka mukatth’ole mwaamukhaani, khurwa khunvaha profeta. Khutthika khupaka mukina, ni mukina, ni mukina, ni mukina. Nto mmwaapuni khuwaamanle-mo, wala murinki khiwuumale, mpakha Muluku orupihela epula mulaponi. Owo aamuhenle Muluku ohoolo wa an’awe. Owo aamuhenle Muluku ohoolo wa etthu p’itthu ekina. Owo aakunxe Omwene wa Muluku, toko.

114 Muluku ohaana okhalana nipuro noopacerya mmurimani mwanyu, nipuro noopacerya mmakhaleloni mwanyu, nipuro noopacerya mwa sothene muniir’anyu wala mukhanly’anyu. Muluku ohaana okhala oopacerya. Owo khontthuna nipuro na nenli. Owo khomphwanela nipuro na nenli. Owo omphwanela yootepa oreera, ni yoopacerya, ni sothene sirin’ahu. Owo omphwanela yeeyo. Ntottompeliwe Nsina Nawe noowaarya!

Tthiri nave-tho Muluku onnikhalela... onamoona, owo aahikhalela onamoona ni ithoonyeryo ni sootikiniha, . . . miiriiryia sinci-ene, ni soovaha sa Eroho Yowarya, ntoko sintthun’awe?

115 Kahi ele mutthu enihimy’awe, ele ekereja enihimy’aya, masi ele yaari otthuna wa Muluku. Oh, nihaana ophavela otthuna wa Muluku, kahi omucalela namwaattamanani anyu, kahi waacalela an’inyu, kahi waacalela aiy’anyu wala amwaar’inyu. Masi, ophavela otthuna wa Muluku, ni wira yeeyo voopacerya. Vano itthu sothene sikina, otthuna wa mwaara ni otthuna w’ana, onookhala saana ni yeeyo. Masi, mmuhele Muluku oopacerya.

116 Nwehe, vano.

Nto owo khovahale malaikha oweriya wo weettiha olumwenku onrwa, yoowo onlavul’ahu.

117 Mwa moolumo makina, Malaikha maalupale anrumeela Wirimu, Kapiriyeli, Mikayeli, Owaawa, ni ikonto imaara muloko imaara ikonto muloko sa Malaikha a Wirimu; wala imiya miloko sene sa maprofeta ankhalaka mulaponi, khula mmosa a yaawo; Owo khonaakhaliheke hata mmosa a awo wira yeettiheke olumwenku onrwa, hiyo onlavul'ahu. Hata mmosa! Owo khonahimyeke wira, "Yesaya, nyuwo munimweettiha olumwenku." Owo khonaheleke olumwenku mo wettiheryani mw'Eliya. Nnakhala khonamuheleke Kapiriyeli, wala khula nlaikha, khula erooho yo orumeela.

118 Nkawehani etthu owo ohimmy'awe, Paulo, nlelo amunnuwihaka Kristu, yoowo onimuhimy'ahu.

Masi wookhala opuro mmosa waakhalenly'awe onamoona, ahimiyaka wira, Mutthu ti pani, okhanly'anyu omuupuwelaka? wala mwaana a mutthu, nyuwo mwaarow'anyu omukhapelela?

Nyuwo moomukhaliha owo mwaamukhaani vakhani ovikana malaikha; nyuwo monvaha ovuwa ni nttittimiho, ni monvaha weettiha itthu sothene mpakaly'anyu:

119 Vano, mwatthuna osoma eyo, ti Masalmo 8:4-6, Davidi alavulaka. Vano owo omwiihanne sayi Davidi va? Eyo ennimaliha mwaha, vaavo vo, sinto kaahilikaniha voosiis'ula, mwa profeta.

120 Owo iirale, "Maana nlaikha nimoso noohimya nipuro nimoso." Davidi, namitthaka a Muluku, aari nlaikha na Muluku, maana owo aari namitthaka a Muluku. Nlaikha noohimya, Davidi oohimya, mwa Masalmo, "Nyuwo moomukhaliha Owo mwaamukhaani vakhani ovikana Malaikha a Wirimu." Nlaikha noohimya wira Muluku oomukhaliha Owo mwaamukhaani vakhani ovikana Nlaikha, wira Owo onwarihe ekhara; ni wira Owo ahaawe ni alawihe okhwa, wira annuwihawe-tho. Wira Owo amukhalihe Owo mu. . . mulipa-oorithi itthu sa molumwenkuni. [Nipuro vahiiitthu mufiitani—Mol.]

121 Vano, mwa—mwa Matewu 28:18, ninsoma sa. Owo vaamanly'awe okhomeliwa vamwiikimanyo khuhihimuwa mmurotoni mwaya, Owo aahikumana n'awiixutti Awe khwaaruma wira erowe mulaponi mothene, yalaleerye Ehapari yooreera soopattuxiwa sothene. Owo iirale, "Koovahiwa owerya wothene Wirimu ni vathi mmatatani mwAka. Owerya wothene Wirimu, owerya wothene vathi, koovahiwa Miyo." Yaari exeeni iyo? Mutthu ni Muluku yaahiphitaana. Logos yaahikhalihwiwa erutthu ni yaahiwiwa, khuhihimuwa wira nikhalihwiwe anaxariya, vano nto aari Emanuweli oottikittheliwa a mahiku othene voohimala. Muluku aathamihale nipuro Nawe n'okhala, okhuma Veehiceni w'ephakani wu, khukela mmurimani mwa Mwan'Awe, Kristu Yesu, wira akhale ni arume

voohimala. “Muluku aari mwa Kristu.” Owo ti nipuro nookiserya na omumula wa Eroho.

122 Eroho yaakhala mutapernakulu, nihiku nimosa, moosuwela eyo, vathi v’eehema. “Nto Salomoni aahimutekela Owo empa. Masi, nave, ole a Wirimu-rimu khankhala ipa sootekiwa ni matata.” “Masi Nyuwo mookuupela erutthu.”

123 Muliivuruni mwa Miteko, kapiitulu 7, okathi waalavul’awe, owo iirale, “Othene aya yaahoonā Eyo. Awo yaahimutekela owo eehema, Moise aahiteka, aarina eehema, nto aapwehaka nivuku memmo, okhala wira Muluku aari vasulu va Mukhuneelo. Owo khaakhanle vaavo.” Vaareera.

124 Vano, “Nyuwo mookuupela erutthu,” erutthu ya Pwiya Yesu Kristu, aakhalihwe mwaamukhaani ovikana Malaikha wira alawihe okhwa; ni khaari pani woohikhala ole muulupalexa a Wirimu, Kristu; Mwene a Murettele, Mwene a mamwene, Pwiya a mapwiya, Mpattuxa a ittheneeri sothene mutuniyani.

125 O Muluku! Owo aahikhala mukhaani ovikana soopattuxa Sawe, wira Owo anvuluxe mutthu (atthu oohikhalana ethoko, oonyanyaliwa), nto khwaavaha ethoko Wirimu. Owo aahihiya ovuwa wa Wirimu. Owo aahihiya Nsina nuulupalexa naakhanle wihaniwaka. Nto okathi Owo aary’awe elapo ya vathi, atthu yanvahale Nsina nootepaxa ohifayi awo yaakhanly’aya onvahaka, yiirale, “Owo aari mwaana ooraruwiwa, opacerya wene.” Aayariwe munikulani, aaputaputeliwe ni mattapwatta yaakumihiwe vamurittini wa enyompe. Hata nipuro n’orowa-wo, khaarina hata ethoko yo orowa-wo. Ni aihaniwa, “Pelizepuli,” mukhulupale a axetwani. Owo aahihaaxiwa. Owo aahisenyeliwa. Owo aahitheiwa. Owo aahikhoottiwa, ni aahirowa mapuro oowiixaxa, aahiwuuramela “Anamittompe ootakhalexa.” Ti yeeyo mutthu aamwiirihaly’awe Owo.

126 Masi Muluku khunvenxerya osulu saana Owo varin’awe oweha vathi wira oone Erimu. Atthu yanvahale ekhukulu ya vathixa, yanvahale nipuro na vathixa, nsina na vathixa. Muluku khunvenxa khunvaha Ekhukulu y’osulu, ni Nsina nuulupalexa. Iwo p’uvirikana wa ele mutthu aamwiirihaly’awe Mwaana a Muluku, ni ele Muluku omwiirihaly’awe Mwaana a Muluku.

127 Owo aahuurama, wira hiyo nivenyihiwe. Owo ohiikhaliha hiyo, wira hiyo ni mahala Awe nikhale Owo. Owo aarwenle ale oohikhalana ethoko, ni khwiikhaliha Yoowo oohikhalana ethoko, wira hiyo nikhhalane ethoko. Owo aarwenle aretta ni khwiikhaliha mureta Mwaneene, wira hiyo nivonihiwe. Owo aamurwenle natampi, “ni khwiikhaliha etampi, Mwaneene,” wira hiyo noopowe.

128 Khivanxankiha Owo aannuwihw’awe. Khivanxankiha okhala Ole Owo okhanly’awe ohiy’ula. Muluku oomunnuwiha Owo, ni owerya wothene Wirimu ni vathi oovahiwa Yoowo.

129 Okathi omanly'aya muteko Awe wa vathi, vathi va... Owo aahirwa elapo ya vathi, Owo arwaaka-ru, ettheneeri y'oxaka yaahimuhimya Owo okhala Mwaana a Muluku. Owo aahimutatha khula xetwani aakumananny'awe. Nttotopeliwe Nsina n'Apwiya! Axetwani yaahithukumela ni yaahiitatha, khuvekela omoreliwa ikharari, Ohoolo Wawe. Ayo, mulopwana. Omooroni wothene waanimusuwela Owo aari Pani.

130 Eetta vowiiyeviha, Owo khaarina nipuro no wuuramiha muru Awe, ohiyu w'epula. Axinama yaale Owo aapattunx'awe, "Axipalame a musulu aakhalana ipuru saya, ni akhwatte aakhalana mittupha saya, masi Mwaana a mutthu khorina nipuro n'owuuramiha muru Awe woottotopeliwa." Vekeekhai, Owo aari yoowo.

131 Owo aahikhala etampi, aahiisuuramiha ni onyanyaliwa. Masi axetwani yaanimusuwela Owo aari Pani. Awo yaahivekela waamorela ikharari. Yiirale, "Nyuwo murwenle-ni onihaaxa okathi ahu ohinatthi ophiya." Ni okathi alaleyi yaamwiihan'aya "Pelizepuli," nahako; axetwani yaamwiihana, "Mwaana a Muluku mukumi," ni evekelaka omoreliwa ikharari.

132 Oh, moota naakhanly'ahu weemelaka minuutu mmosa paahi! Nyuwo mw'ani, khula enamuna? Mutek'owo murin'anyu onihimya-ni? Wala emp'ele ekhaani erin'ahu enihimya-ni? Ekaaro erin'ahu enihimya-ni?

133 Mwaaruusi ooreera, nyuwo oolakanya mwaamukhaani, oreera iwo murin'anyu vano onihimya-ni? Nyuwo mwammiravo murina maihi, oocerimela ni oothererya, makhata owookowa; nihiku nlo munimuurama, okathi onrow'anyu okhurupuwa mwaha wo wuuluvala.

134 Masi, attotopeliwe Apwiya! Muhaana munepa oyariwe vasya. Munookhala mahiku othene voohimala, okhala wira Owo ookhala opuro anyu, wira nyuwo mwa mahala Awe mukhale Owo, ni okhaliha opuro wa nyuwo.

135 Oh, hiyo ninuupuwela wira okhala wira ninnaakakhanya ikuwo, ni soolya vakhani owaani, hiyo na xeenii? Muluku aamuwerya okuxa muhina mwa esekuntu emosa. Omumula wanyu ori mmatatani mw'Awe. Ni Owo ori eriyari ahu wira aavonihe aretta, wira alaleerye ni ahimye, ni alopole, ni khula okathi yoolikana. Ni oocaliwa voophiyerya wira, ahihimuxe ehopa yaamukhaani yookhwa, eriyari ahu. Yehova ni hiyo, Yehova mwa hiyo, MIYO KOOKHALA muulupale ni a ikuru.

136 Okathi Owo okhwiy'awe, awo yuupuwela wira yaahimuxintta. Owo aahikhuruwela omooroni. Okathi Owo okhumaly'awe mulaponi nihiku nle aakhomeliw'awe vamwiikimanyo, Owo aahirowa mapuro a ale oopweteya. Bibilia ohimmye wira, "Owo aahirowa olaleerya minepa s'ale yaatthukweliwe, yahaarukunxale murima moovilelani, mahiku a Nowe." Owo vakhwiw'awe, nto Eroho Awe khimuiya, Owo

aahikhala-tho Logos. Owo, kinnimoona, iirale, “Miyo kikhumme wa Muluku. Kintthikela wa Muluku.”

137 Ni Muluku aari Nlumi nle na Mooro naaweettiha aana mothakoni. Ni okathi Owo aary’awe muumu elapo ya vathi. . . Ni okathi Owo okhwiw’awe, Owo aahitthikela-tho okhala Waarya. Paulo aahimoona, nto Owo aari Waarya. Khaavo akina w’ale yaamonne Owo. Awo yaamoonale Paulo omora. Yookhala ethu yammanne, nto Iwo waari Waarya. Paulo khwira, “Ti Pani Uwo ommulupatth’aka?”

138 Owo khwira, “Saulo, Saulo, munikilupatthelani?”

Khwira, “Ti Pani Uwo?”

139 Owo khwira, “Miyo ka Yesu, nyuwo ommulupatth’anyu, ni ti yoorika wa nyuwo okhootta ele enoovahani ikuru.”

140 Nto owo aahirowa khusoma Waarya iwo. Paulo aatthikenle mBibiliani, wira asuwele ele waari Waarya iwe. Vano owo khulepa Ewarakh’ela. Owo ti Yehova mmosaru. Waarya weiwe omosaru waari mothakoni n’ana a Isarayeli. Nto okathi Petru aary’awe mukhatteya, Owo aari Waarya waavolonwe khuhula mikhora.

141 Nto ni mahala Awe, khaavo hata mutthu onrowa okhalana ntthyawelo. . . Oh, awo yaawenrye-ru waaliyala anamitthaka oohisoma, nto khuupuwela: kahi namitthaka, ti Mutthaka. Owo ookhuruwa-tho, ni hiyo, ni mukhalelo wa Nlumi na Mooro. Ni Owo onneetteetta ni miiriirya imosaru ni ithoonyeryo, khiivo ekhanle ota wa Bibilia; okhalaka oratta-ene ni Bibilia, amukhalihaka vathi vo wiiwelela, akumiheryaka ovuwa Wawe, ooniheryaka owerya Wawe. Nttotopeliwe Nsina Nawe noowaarya!

142 Koosuwela wira nyuwo pooti wuupuwela wira kiroovahuwa; masi oh, Omumula iwe Woohimala ori mmunepani mwaka. Hata wira itarupa sinooruma, nankura aka onlipa mukuwoni.

143 Ni omoona okathi Owo okhwiw’awe, mpakha, mweeri waahilosowa. Nsuwa naahitupweela othana eriyari. Ni okathi Owo oronw’awe mapuro a ale oopweteya, [Munna Branham ommana vapulpitu imaara xexe—Mol.] aahimana mukhora, vano mukhora waahihuleya. Bibilia ohimmye wira, “Owo aahilaleerya minepa saatthukweliwe, s’ale yaahaarukunxale murima moovilelani mahiku a Nowe,” Owo numala okhwa elapo ela ya vathi. Munn’aka mulopwana, muthiyana, okathi Owo okhwiw’awe, muteko Awe wa vathi va waahimala, masi Owo nlelo aavara muteko. Ni Owo nlelo ori mmutekoni ohiy’ula. Amen.

144 Owo aahimana mikhora s’ale oopweteya. Bibilia ohimmye wira Owo aahimana. Ni Owo aahihimya, “Miyo ka Osulu wa muthiyana. Miyo t’Ule Atamu aamuhimaly’awe. Miyo t’Ule Enokhi aahimaly’awe wira aamoowa ni oowaarya Awe

ikonto muloko. Miyo ka Mwaana a Muluku mukumi, ni nyuwo moottheke muhiyaka nihiku nanyu na mahala. Masi mwahilaaleriwa, ni malaikha, Enokhi, Nowe, wira kaahaana orwa wira kimaliherye Masu othene a mBibiliani a Muluku. Miyo kiri va ntoko namoona 'elapo ela y'ale oopweteya.'" Nto Owo aahaalaleerya.

Owo aahikhuruwela omooroni, mpakha vamukhora wo omooroni, khumana mukhora. Xetwani aahihula mukhora, khwira, "Kihoovarani vano."

¹⁴⁵ Khumwaakha ihulelo mpararini mwawe, khwira, "Nyuwo xetwani, muhihimya okathi munci-ene." Ela va, mBibiliani mu. Kinoophiyerya yeeyo minuutu mmosa. "Nyuwo muhihimya okathi munci-ene, masi Miyo kihoorwa oxintta." Khukuxa ihulelo iye khunvaha mukhutaape khukela muhina, vano khuwala mukhora.

Khuvira khimukuxa Abrahamu, Isakhi, ni Yakope. Mmurotoni mwaya owo aahihimuwa, nto ale jaarupa mmahiye yaahihimuwa ni Yoowo. Oh, aleluya! Khivanxankiha namalepa ohimya wira:

Akhalka, Owo ookiphenta; akhwaaka, Owo
ookoopola;
Vavithiw'awe, Owo oorooha itampi saka
ottaiwene;
Ahihimuwaka, Owo ookikhaliha naxariya
mahala-ene,
Nihiku nlo Owo onimoorwa, oh, Nihiku
noovuwa.

¹⁴⁶ Nttotopeliwe nlutte nimphitaaniha mirima sahu ni opatthana w'oKristu, ophenta wa Muluku. Okathi Owo ohihimun'awe, Owo khaamanle, nlelo. Owo aahikhallana muteko mukina wo ovara.

¹⁴⁷ Biblia ohimye wira "Owo oowela Wirimu khwaavaha atthu soovaha." Waahikhala mukhalelo vasulu v'elapo, y'epiphi, y'eriipelo, ya okhwa, ni okhulumuwa. Mavekelo khiyaawela, okhala wira Elivelo khayiiriwe. Masi, Owo aahikhera ekuwo eyo. Owo aahitthukula ephiro. Owo ookhera ekuwo y'eretta. Owo ookhera ekuwo y'etampi. Owo ookhera ekuwo yo okhulumuwa. Owo ookhera ekuwo y'ale oonyoholiwa. Owo ookhera ekuwo, khupaka ephiro yuulupale ya namukwaha, oneetta arowaka ephiro yuulupale ya Mwene. Oh, wulu, okathi Owo oviraly'awe mweeri ni ittheneeri, khurwa-tho!

¹⁴⁸ Ottuli Wawe, jaarwa ale Oowaarya a Waataana Wa Khalayi, Abrahamu, Isakhi, ni Yakope. Awo jaarowanse olukama wene wirimu wa Wirimu. Okathi waaris'aya ottaiwene woorakamela Muttethe kinniwerya owoona evenxale maitho. Abrahamu khwira, "Ole ti Muttethe kaaphavel'aka wona. Oh, murwe va, Isakhi. Murwe va, Yakope. Oh, hiyo naari anawetta ni

amalapo a mulaponi, masi ole vale Muttetthe. Vale ori Ole naamulipelel'ahu."

149 Ni Bibilia ohimnye wira awo yaahikhuwelas, "Mutthukuwe, nyuwo mikhora sa mahiku othene, ni muhuleye, wira avire-mo Mwene Oovuwa."

150 Nto Malaikha ottuli wa mikhora yaahikhuwela yaakhulaka malaikha ala nno, ni khwira, "Mwene ola Oovuwa t'ani?"

151 Nto malaikha ala nno, maprofeta, khwira, "Apwiya a Mittithi s'anakhotto, Oowerya mukhottoni."

152 Nto awo yaahivirasa yaahitthitta ipitawu nto mukhoro muulupale khuhuleya. Naanaanoru Owo khukela eriyari ya iphiro, Muxintta, oowerya, n'ale oowaarya a Waataana Wa Khalayi yeettaka ottuli Wawe. Khukilaathi Veehiceni, khwira, "Tithi, ala va. Awo t'Awinyu."

153 Owo khwira, "Welakani nno mukilaathi, mpakha kaakhalihe awanan'inyu nthatto na inawu Sanyu." Okathi onsom'ahu, ninooophwanya yeeyo va mwa Yoolempwa. Vaareera.

154 Nwiriyaane. Vano nry'ahu eversiikulu 8 ila:

Vano owo *vanvahalyawe weettiha itthu sothene. Tthiri...owo onvaha weettiha itthu sothene, khiivo etthu yaahiyalyawe wira ehi...ehimwiuweleleke. Masi hiyo khinnoona...itthu sothene simwiuweleleka yowo.*

Iwo, okhwaa. Hiyo khamnoona okhwa, nlelo, okhala wira nlelo ninnookhwa. Hiyo ninnoona okhwa.

Masi, versiikulu 9, "Masi nimmoona Yesu!" Amen. Nwiriyaane.

...ninnimoona Yesu, ole aakhalihawe mukhaani eriyari ya malaikha wira ahaawe mookhwaani, ovahiwe nttittimihoni ni nlemeliho; wira mwa mahala a Muluku owo avire mookhwaani aakhwelaka atthu othene.

Xeeni Owo aakhalihaw'awe mukhaani waavikana Malaikha? Wira Owo avire mookhwaani. Owo aahaana okhwa. Owo aahaana orwa, wira akhwe.

155 Nkawehani va, mpatthani. Muhikhalakhale, muliyalaka ela. Okathi Yesu waarow'awe, awalaka mwaako, okhwa waanimunyakula vamuru Vawe.

156 Nrowe niroihe yookhumela ahu oYerusalemu, miyaakha ikonto piili sivinre. Ni mwaarowa okhootta sayi Iyo? Kinniiwa oruma orwaaka mphironi. Exeeni iyo? Iwo omaniwa w'etthu. Owo mwiikimanyo woolipa onrwa, okhumaka mikhora s'oTamasiku, omanaka vamasorosoroni. Masorosoro awo nlelo ari weiwe. Omanaka myala iya suulupale, bampti-bamp. Kinnoona ottonya w'Ephome mphironi. Exeeni iyo? Ti Mutthu ohiirale etthu yootakhala; hat'etthu woohikhala

yooreera. Atthu yaari oohoona. Awo khiyaamusuwela Owo. Awo khiyaamusuwenle Owo.

Nyuwo muniira “Oohoona? Awo yaamuwerya okhalana woona waya?”

157 Nyuwo pooti okhalana eyoonelo anyu nave khukhala oohoona. Munnaamini yeeyo? Bibilia ohimnye siiso. Munnimuupuwela Elisewu a oDotani? Owo aahirowa khwariipiha wiitho atthu, khwira, “Vano mukitthareke.” Awo yaari oohoona wa yoowo.

158 Nto atthu ari oohoona ohiy’ula. Ekereja emosa ehinaamini ovoniha wa Muluku, yaahikirweela emaara emosa, khwira, “Mukikhalihe oohoona. Mukikhalihe oohoona.” Waari owannyawe Munna Wright. Khwira, “Mukikhalihe oohoona.” Khwira, “Paulo aahimukhaliha mutthu ohoona, emaara emosa.” Khwira, “Mukikhalihe oohoona.”

159 Miyo khwira, “Mpatthani, xetwani ohiira. Nyuwo khamunoona. Vekeekhai, mwa oohoona.”

160 Owo khwira, “Munvonihe mwaarusi ula nto kinoowaaminini.”

161 Miyo khwira, “Mmooopole natampi ule nto miyo kinoowaaminini.” Vekeekhai.

162 “Oh,” owo khwira, “owo ohaana waamini.”

163 Miyo khwira, “Etthu emosaru va, ehaana orwa ni mahala vootthuna wa Muluku.”

164 Xetwani, mu—muluku a olumwenk’ula, ohaariipiha wiitho atthu. “Awo ahaana maitho masi khanwerya woona,” Bibilia oohimya.

165 Owo aari va, awelelaka ephiro, apurulaka maravulo a inawu a Ephome mphironi arowaka. *Enwi* ya mookhwaani emurukureryaka, emunyakulaka Yoowo, “Okathi vakhani paahi kinimookuxani Nyu.” Owo aanikhala ootteettheya, avoliwe-ene nthona na maasi.

166 Miyo kootoko woopeliwa, khurupaathi nno okampu, ephome ekikhumaka paahi. Kaaninlela maasi. Nto mpatthani aka khuthimaka, khukuxa exapheyo awe khuhela mmaasini; oottakatta, maasi yaarina anaarokhinya. Khurwa, vano miyo khutthukula eyano aka; owo khuwamela yaawo. Okhala wira, ephome yaanivuuva ntoko naattuuttu, vaavo koopeliw’aka kapatti-kapatti ni kapwitthi. Nikivolaka nthona!

167 Vano kinnisuwela etthu Pwiy’aka iir’awe okhanle-ene, numala ovuuva ephome voosiis’ule, okhuma ewoora ya neethanu na xexe ohiyu, mpakha ya natthaani empweteyaka Ephom’ele yothene. Kinnoona ekuwo Awe, toko, ntoko malepa makhaani vaavo. Nto malep’ale othene khupacerya okhala maalupale n’ukhala vamosa, khupaka nlepa nuulupale n’Ephome,

nimmanaka Owo vamwettoni okathi weett'awe. Eyo yaari Ephome ya Emanuweli. Oh, elapo khiyaaphwanela Eyo.

¹⁶⁸ Masi okathi Owo aarow'awe, *enwi* ila emuupeeryaka. Eyo yiirale exeenii? Vookiserya yaahimuluma.

Masi, munna, khula mutthu onnisuwela, wira mwaaxikokho wala enwi, yahalaru woolumani omosa, woomala muteko aya wo oluma. Khenwerya-tho oluma. Okhala wira, yaakhumaka, enoomoroxa mpunu aya.

Mwaha wa yeeyo Muluku aahaana wiipaka erutthu. Owo aakuxale mpunu wa okhwa mw'erutthuni mw'Awe, nto khukumiha mpuno wa okhwa. Nttotopeliwe Nsina n'Apwiya! Okhwa pooti onyakula n'uluma, masi khunwerya wootakhalihani.

¹⁶⁹ Paulo, okathi woonaly'awe *enwi* iyo emuupeeryaka, okhwa waamorwa. Owo khwira, "O okhwa, owerya wanyu ori vayi?" Owo aaniwerya othoonya oKalvario weiwo ohiw'aya mw'erutthuni mwa Emanuweli. "Oxintta wanyu ori vayi? Masi nimuxukhuru Muluku yoowo onnivaha oxintta mwa Pwiy'ahu Yesu Kristu." Ayo.

¹⁷⁰ Hiyo khamnoona itthu sothene.

Masi hiyo nimmoona Yesu, yoowo aakhalihwe mukhaani eriyari ya malaikha wira...ahaawe mookhwaani,...

Tthiri vaanirerela owo, mwa yoowo sothene—ithu sothene sinikhalel'aya, mwa yoowo hiyo sirin'ahu itthu sothene, wopa...aana anci-ene...ni okhalihwa muhooleli a woopowa wahu...mwaha wo ohaawa.

Enamuna emosa paahi Owo aakhanly'awe okhalaka Muhooleli a woopowa wahu, Owo aahaana ohaawa.

¹⁷¹ Nwiryane Masu ala ooreera va vano. Vano nwiryane.

Siiso hata ole onaareerihia atthu nnakhala ale anreerihwa othene...mmosaru:...

Oh, khamunoona Mwiri ni Erintta vo? [Muthukumano oniira, "Amen."—Mol.] Othene Mmosa.

...tivo vahinuuleliw'awe muru owiirela axinna,

Munnona? Mwaha wa xeeni? Nwiryane, eversiikulu entharelana.

Ahimyaka wira, miyo kinooolaleya nsina nanyu eriyari y'axinn'aka, varyari va ekereja kinoowiipelani masipo nyuwo.

Nave-tho, miyo kinoomuroromela yoowo. Oohimya-tho wira, Miyo kiri n'ana nyuwo mukivahaly'anyu.

Tivo okhala wira aana awo anniira mpantte wa erutthu n'iphome, siiso-tho owo aahikhalana makhalelo

*a atthu yaawo; wira mwaha w'okhwa amuxintte ole
orina oweriya w'owiiva, eyo piyo, zetwani;*

*Ni wira awoopole ale mwaha...wa e...mwaha...
okhwa okathi wothene yaari mw'epothhani.*

172 Mutthu kweekwe t'owoova okhwa. Kristu aahiikhaliha etampi, aahiiyeviha, wira akuxe okhwa mwa Yoowo. Ni Owo khonuuleliwa muru wiihaniwa "Munn'ihu," maana Owo aahittehattehiwa siiso ntoko hiyo sinttehattehiw'ahu. Ni Owo onniwerya opaka e...okhala mulapeli oophwanela, okhala wira Owo aahivilela ottehattehiwa omosaru nyuwo munvile'anyu. Ni Owo ookhala voopuroni vanyu, asuwelaka wira nyuwo khimwaawerya okuxa mmansinyu.

173 Tivo, khamunoona, munna mulopwana, muthiyana? Etthu yothene mahala. Yothene eyo mahala. Kahi ele muniir'anyu, khula enamuna. T'ile Owo owiireny'aweni. Vano, khamukhanle wira etthu wira mphwanele woopowa wanyu. Woopowa wanyu yoovahaa. Kristu aikhalinhe etampi, wira nyuwo mukhale exariya. Ni Owo ti enamuna emosa ya Muhooleli eekeekhai wa woopowa wahu, okhala wira Owo oohaawa ntoko hiyo sihaawaly'ahu. Owo oottehattehiwa ntoko hiyo sinttehattehiw'ahu. Ni Owo khonuuleliwa muru wiihaniwa "Munn'ihu," okhala wira Owo onnisuwela sinvir'ahu-mo. Oh, nntotopeliwe Nsina Nawe!

*Tthiri owo khokuxale malaikha; masi okuxale osuulu
w'Abrahamu.*

174 Oh, wulu! Owo khaikhalinhe Nlaikha. Owo aari Osuulu wa Abrahamu. "Ni hiyo, vakhwiw'ahu mwa Kristu, na Osuulu wa Abrahamu, ni n'atthu oorithi ntoko siroromelinhawe." Munnona? Owo khaakuxale Nlaikha. Owo khanakhaleke Nlaikha. Owo aikhalinhe Mutthu. Owo aari Osuulu w'Abrahamu, nto khukuxa mpunu wa okhwa mw'erutthuni mw'Awe, wira otthikele onaataaniha ni Muluku, nto vano onikilaathi iwe ntoko Mulapeli. Wulu, naarowa oweriya sayi okhootta Yeeyo, mpatthani?

175 Nwiriyaane.

*Siiso aahaana ailikanyihaka n'axinn'awe mwa itthu
sothene, wira akhale namukuttho oomoriwa ikharari ni
oororomeleya mwa itthu sa Muluku, wira aliverye...
itampi s'atthu.*

176 Wira Owo akhale Namwaataaniha! Moone, waahikhala owanani varyari va Muluku ni mutthu. Ni khaavo mutthu... .

Yaahirummwa malaikha, maprofeta. Awo khiyaawerya okhala voopuroni vanyu, okhala wira yaahaana wiivekelela. Awo khiyaawerya okhala voopuroni.

177 Nto, Owo aahiveleeliha ikano. Ikano saari mupiliisa saanihela mukhatteya. Khisaawerya onikumihia. Owo aahiveleeliha ikano.

Owo aahaaveleeliha maprofeta, Owo aahaaveleeliha anaxariya, nto sothene, khasaawenrye opaka elivelo. Masi Owo aahikhuruwa khukhala mmosa a hiyo. Oh, wulu!

178 Kaanitthuna nikhalanne-ene tho okathi vano, kaatthuna koophiiheni mwa ikano so ovuluxa; masi khanirina, masi okathi vakhani paahi. Elatarato yooreerela eri mwa Ruthi ni Nowemi. Moonaru vaavo, waataanihiwa, moota mulimi, mulopwana aari wira oopole mureerelo waarimenle ni waamonre, aahaana okhala mmusi a ole waamurimenle mureerelo. Mwaha wa yeeyo Bowazi aahaana okhala mu...aari mmusi a Nowemi, wira awerye omukuxa Ruthi. Vano nto, aahaana okhala oophwanela. Owo aahaana owerya wira, wira oopole yaarimenle. Nto Bowazi, vamukhora, aahihimya oxaahiti v'atthuni, arulaka exapattho awe, wira aahimooopola Nowemi ni sookhalana sawe sothene. Ni owo aahaana okhala mmusi.

179 Ni mwaha wa yeeyo Kristu, Muluku, aahaana okhala mmus'ihu. Ni Owo aahikhuruwa khukhala Mutthu. Ni Owo aahivira moottehattehiwani. Ni Owo aahithehiwa, aahiveehiwa, aahilupatthiwa, ohicaliwa, ni wiihaniwa "Pelizepuli," ni—ni aaninyemulasiwa, aahivira mookhwaani vathi va ehukhumu ya mookhwaani. Munnona? Owo aahaana okhala mmusi wa hiyo. Owo aahaana wootheriwa, okhala wira nyuwo munnootheriwa. Owo aahaana okuxa iretta, okhala wira munniwereiwa. Owo aahaana okuxa itampi, okhala wira saari itampi sanyu. Ni Owo aahaana okhala mmusi. Enamuna emosa paahi Owo aakhanly'awe onoopolaka waari okhala mmusi wa hiyo. Ni moota Owo aakhanly'awe mmusi, waari okuxa mukhalelo w'erutthu ya etampi khukhala mmosa a hiyo. Nto mwa yeeyo, Owo ooliva ehisapo ni khunivuluxa anihokoloxeryaka m'opatthanani w'Atithi. Oh, Moopoli xeeni! Moolumo khanwerya ohimya.

Okhala wira mwa yeeyo owo eehereriw'awe siiso-tho, . . .ni onoowerya waakhaliherya ale aneehereriwa.

180 *Okhaliherya* enihimya "okhupanyerya." Eyo, etthu Owo aaphiyenry'awe okhala *yeela*, yaari wira Owo akhale owookhupanyeryani nyuwo mukhanle. . .murina sa *vasulu* ni *vathi* sanyu, ni itthu sanyu *sikhani-sikhani*, ni ottehattehiwa wanyu ni sinkhala suulupale muhinwery'anyu ovilela. Owo onnisuwela moota wo wookhupanyeryani. Owo onikilaathi vale, wira alapele. Owo onikilaathi vale, wira oophentekeni. Ni enamwi mukhumaka mphironi, Owo khonrowa woonyanyalani. Owo nlelo onimoottharani ni onoomana vamurima vanyu. Khaavo namatthikela ottuli mpaani mu ohinsuwela wira Muluku onnimana murim'awe khula nihiku. Ni Owo onimwiira

mwaakhalaka-ru mutthu onookhwa mulaponi mu, maana Owo ohoophentani. Owo ohoovuluxani.

¹⁸¹ Anamalepa aaphavela, alipa-owwiira animweererya, mutthu omphavela ohimya mwah'owo wa "ophenta," nave khanwerya ophwanya muhina mwa moolumo a atthu. Mmosa iirale:

Oh, ophenta wa Muluku, wowaatta wooloka!
 Woohiphimeya ni wa ikuru!
 Onookhala mahiku othene,
 Wiipa wa Oowaarya ni Malaikha.
 Ephareya yothene yaari etinta,
 Ni erimu epaphelo;
 Ni khula nikukhu mureka,
 Ni khula mutthu namalepa;
 Wira olepe ophenta wa Muluku
 Ephareya yaamuuma;
 Wala eliivuru yothene kiwaamalela-mo,
 Yaataliwe-ene erimu n'erimu.

¹⁸² Khamunkhalakhala musuwelaka saana. Khiivo enamuna ya nyuwo osuwela saana ya hiyo osuwela saana wiivahererya iwo wothene, Owo iiraly'awe, okhuruwa ni otthikela onaataaniha ni Muluku. Vano Owo khutthika khwira, "Vano, Miyo nkinoohiyani ntoko ikwasuni. Kinimoorwa-tho kikhale ni nyuwo, hata mwa nyuwo, mpakha omala olumwenku."

¹⁸³ Nto hiyo nri va olelo, nikhalaka okathi wa woomalelani, ni Yesu yoowo mmosaru, itthu imosaru, ithoonyeryo imosaru, sootikiniha imosaru, woopowa omosaru, Eroho emosaru yiiraka itthu imosaru, Ehapari yooreera emosaru, Masu mamosaru, iyooniheryo imosaru, wooniherera omosaru, sothene. Entthuneya hiyo ohinyoonyeriwa woopowa nno wuulupale, maana ninoorowa waakhula, nihiku nlo, n'ile enimwiirih'ahu Mwaana a Muluku.

¹⁸⁴ Owo ori mmatatani mwanyu olelo, natampi, namatthikela ottuli. Munrowa omwiiriha exeeni Yoowo? Nyuwo muniira, "Ahe, kinoohiya Eyo ekhale ya okathi mukina." Masi, muupuwele, muhiire yeeyo. Khiivo enamuna, nnakhala, mwaari natampi, mukhanly'anyu okhuma mpaani mu khukhala mmosaru. Khamukhanle wira.

¹⁸⁵ Pilato, ohiyu omosa, aaheererya wira. Owo aahiihaniha maasi khunyawa. Khwira, "Miyo nkirina naata n'Iyo. Eri ntoko wira nkinatoko wona. Nkinatoko wiiwa Ehapari yooreera. Nkinthuna etthu ni Yeeyo." Aahiwerya onyawa okumiha mmatatani mwawe Yeeyo? Khaawenrye.

¹⁸⁶ Vookiserya, moosuwela etthu yaamukhumelenle Pilato? Owo aaroovahuwa. Nto oSuwiisa wu, weiwo waary'ahu-wo mwaisana, nilaleyaka Ehapari yooreera, vano yookhala ethale enihimya, wira, yookhala etanki ya maasi weiwo, vaavo atthu anrw'aya okhuma elapo yothene, wira eweheke, khula mwaakha,

okathi wa okhomeliwa vamwiikimanyo. Pilato, owo aahiirihela mookhwaani, aisiivaka, mwaha wo otuphela mmaasini mu khwiixuwa. Nto khula mwaakha, nihiku nenlo, maasi oopipila anookaphula vatankini vaavo, wira yooniherye wira Muluku ookhootha maasi awo. Maasi khanwerya orapiha Ephome ya Yesu mmatatani mwanu wala munep'anyu. Eri enamuna emosa yo wira, okhanle okupali Iyo ntoko oleveleliwa wanyu w'omeekha ni waataanihiwa ni Muluku.

Nivekele.

¹⁸⁷ Tithi a Wirimu, hiyo ninnooxukhuruni Nyuwo ohiy'ula mwaha wa Masu. "Maana waamini onrwa mwaha wo wiiwa, ni wiiwa Masu." Hiyo ninnooxukhuruni mwaha wa Yesu. Nto noonaka nihiku nla nuulupale ninkhal'ahu, moota ithoonyeryo ni sootikiniha, moota nnihiy'ahu itthu iya onivira. Muluku, mutthukule maitho a atthu mutapernakulu mu, ohiy'ula, wira ewerye woona ni osuwela saana wira hiyo nri iwoora sookiserya. Okathi onoovira. Khanirina okathi munci-ene w'okhala mu, ni nihaana omoona Yesu. Ni nihaana ohimmwa okhala oohiroromeleya, maana khanivo ntthyawelo. Voosiis'ula, okathi Nyuwo nvahaly'anyu yoowoona ele yuulupale, ya ikuru, ya mulopwana ole orwaaka va, okhuma elapo y'ottaiwene; ni omoona owo, voohihovereya, ovenya vakhaterani vale ya iroota, waakhela woona wawe. Metto sawe khukhala soolipa, mpaani mothene, ohakalala ni omuttotopela Muluku. Eyo enooniherya wira Muluku nlelo onniwerya maluku ala waapattuxa aana a Abrahamu. Woonu soowoona, siiso ntoko Yesu sihimaly'awe, "Miyonkinvara etthu mpakha Atithi okooniherya. Nkinwerya ovara etthu."

¹⁸⁸ Mulopwana oohoona aahimutthara Owo, khwira, "Kimoreleni ikharari."

¹⁸⁹ Owo khwira, khukwanyanya maitho aya khwira, "Ntoko saaminn'anyu, ekhale siiso."

¹⁹⁰ Vano, Pwiya, hiyo nimmoona Yesu. Hiyo khannoona itthu sothene. Hiyo ninnoona wira nlelo ninnaakuxa ale oowaarya ahu waaroiha mmahiye, ni ninneetta vamahiye v'akina. Masi nimmoona Yesu omulampe natiri. Hiyo ninnimoona Owo ni hiyo. Kahi Yesu mmahiye, kahi Yesu miyaakha ikonto piili sivinre; masi Yesu ohiy'ula, yoowo ori ni hiyo. Hiyo ninnimoona Owo wiisooniherya mwa owerya Wawe wothene, ni ithoonyeryo, ni sootikiniha.

¹⁹¹ Muluku, nihikhalakhale ninyoonyeriwaka Woopowa nno wuulupale. Masi nuupaanyerye Yoowo, ni nikupali, ni nikhale oottittimiha, ni nikhaleke ni Yoowo mpakha nihiku Yesu onrw'awe onikuxa oniroiha Owaani. Munivahe, Pwiya. Hiyo ninvekela mwa Nsina Nawe.

¹⁹² Nto nuuramme-ene muru, kaatthuna kisuwele aakhanle-ene mutthu mpaani mu ohiy'ula, vathi va Mukhalelo w'oMuluku

wa Eroho Yowarya, aarowa wira, “Munna Branham, miyo kookupalihiwa wira koovonya. Kookupalihiwa wira koovonya. Muluku ookuupululela itampi saka. Ni koosuwela wira koovonya. Kinonvexerya ntata Yoowo ni kivekele omoreliwa ikharari, ohiy’ula. Muluku, mukimorele ikharari. Koovonya.” Munimwiira yeeyo?

¹⁹³ Nilipelelaka okathi vakhani paahi, aakhanle-ene mutthu wa onthuna wira, wookhala opatiiso onrowa wiiraneya muhina mwa okathi vakhani. Nto nyuwo mwaari natampi, miyo kaamurukunxa murima. Munwerya sayi okhootha ophenta iwo woohilikanyiheya wa Ole okhwiye? Muluku oowaarya a Wirimu aaikhalinhe Mutthu natampi; kahi mwaha wo wira Owo aarimwiira etampi, masi mwaha wo wira Owo okuxale itampi sanyu, khuroiha iwe oKalvario. Nto nyuwo khimunaakhela oleveleliwa iwo? Khamuntthuna wira ohiy’ula? Nuuramme-ene muru, mutthu oniira, “Mukuupuwele, Munna Branham. Kininvenxerya matat’aka Kristu, ni wira, ‘Kimoreleni ikharari. Miyo, miyo koovonya, ni kintthuna waataanihiwa ni Muluku.” Mwaamuvexa ntata?

Vaareera, vakhala wira atthu othene t’aKristu, vano, nrowe nivekele.

¹⁹⁴ Tithi, hiyo ninnooxukhuruni Nyuwo ohiy’ula, wira atthu othene mu t’aKristu, wira aakhalela onamoona yeeyo mwaha w’okhala oomaala, wira itampi saya siri vathi v’Ephome. Ni miyo kinnixukhuru vanci-ene mwaha wa yeeyo. Mwaareerihe, Pwiya. Oh, kinnixukhuru vanci-ene wira awo aaphwanya waataanihiwa muhina wo ovaheriwa w’Ephome, mwaha wo wiiwa Masu. Orapihwa wa maasi, ni Masu, Awo anninikukuttha. Anniniruuha nipuro nuulupalex, vaavo—vaavo natampi, ni epipi awe yootakhala, onkhalihw’awe ootteela ntoko nakhutu. Malepa oophilivila a etampi aarapihiwa, ni hiyo na soopattuxiwa isya mwa Kristu. Moota onooxukhuru-ahuni yeeyo, Nyuwo, mwaha wa yeela.

Vano muteko w’opatiiso onootharelana. Koosuwela wira mwali ula, ohiy’ula, onrowa opatishiwa va, mu Nsina n’Apwiya awe.

¹⁹⁵ O Tithi a Wirimu, hiyo ninvekela wira Nyuwo mmureerihe mwali ula. Mmuruni mwaka kinnuupuwele mahiku vakhani avinre, kirwaaka oHenryville ni kaahimoona mwali uwo oophenteya eettaka mphironi. Nto ohiy’ula, owo maama, muhano. Owo oohookupalini Nyuwo okhala Moopoli awe. Makhalelo annikhalaka oolipa wa mwamuthiyan’owo, Pwiya, O Muluku, masi yookhala Erimu wa owo. Ni hiyo ninnooxukhuruni Nyuwo mwaha wa yeeyo. Hiyo ninnivekela, Muluku, wira mmureerihe mwamuthiyan’owo vano. Nto aarwaaka opatishiwa ni maasi, Nyuwo mmusarihe Eroho Yowarya ya Muluku. Munivahe, Pwiya. Munep’awe okhale

wohakalalaxa, ophiye Wirimu! Munvahe wa ovuwa Wanyu. Hiyo ninvekela mwa Nsina na Yesu. Amen.

[Nipuro vahiitthu mufiitani—Mol.]

¹⁹⁶ Kintthuna kisome mwa Miteko, kapiitulu 2; Petru alavulaka, Nihiku na Pentekosite, opatiiso woopacerya waatonko wiiriwa muKereja y'oKristu. Petru, aapwapwelaka aFarisi ni atthu oochoona, mwaha w'ohimusuwela Mwaana a Muluku; alavulaka moota Muluku aamuhihimunx'awe Yoowo, khooniherya miteko Sawe, mwa ithoonyeryo suulupale ni sotikiniha. Nwiriyanne ela, okathi waalavul'awe. Owo aamunnuwiha Yesu.

¹⁹⁷ Khula erooho y'oKristu enimunnuwiha Yesu, kahi ni iyano sanyu paahi, masi ni makhalelo anyu. Iyano sanyu pooti ohimya etthu emosa, makhalelo anyu khunaira ekina. Mwairaka siiso, moosuwela exeeni iyo? Enamirima miili. Ni miyo kaamwamputi ophiya Wirimu ntoko mutthu oohaamini ehikhanle namirima miili. Miyo kookupali wira, kaamwiileva, Wirimu, ntoko mutthu oohaamini, ohikhanle okhala namirima miili. Miyo vekeekhai... Nyuwo mwaamukhalelaka onamoona Yesu ni wira, "Owo Moopolii," mukhaleke siiso, okhala wira atthu anrowa owehererya eyo wa nyuwo. Eyo ekeekhai. Mukhaleke ntoko sinthuney'aya muKristu okhala. Hiyo nihoona eyo voosiis'ula.

¹⁹⁸ Vano, Apwiya yatthuna vale, meelo ohiyu, wala... Namararu ohiyu, ninrowa okuxa kapiitulu 3, ekhanle ekapiitulu yoorerexa. Nto vano, mwiilipihe mphavele orwa Namararu ohiyu. Akavi anttottela muraarelo Eliivuru ila, wa wiixuttiha nno wa exikola ya Ttiminku? [Muthukumano oniira, "Amen."—Mol.] Oh, kooxukhuru vanci-ene. Ti yoorera.

¹⁹⁹ Vano, kintthuna kisome mwa Miteko vano, kapiitulu 2, opacerya versiikulu 32.

*Muluku oomuhihimuxa Yes'uwo, yoowo hiyo...
nimukhalenly'ahu onamoona. (Awo yaanisuwela eyo.)*

*Tivo oottittimihwa akhalaka moonoo woolopwana
wa Muluku, ni oomwaakhela w'Atithi natiri a
Eroho Yowarya, Owo oomwarexa ela, yeeyo nyuwo
munoon'anyu ni muniw'anyu.*

²⁰⁰ Vano munwiriyanne owo olavula sa Davidi, nimoso wa malaikha.

*Maana Davidi khawenle wirimu: masi owo aahihimya
mwaneene wira, APWIYA ahaahimeerya Apwiya'aka wira,
Mukilaathi moonoo aka woolopwana,*

*Mpakha miyo waahela awanan'inyu vathi va inawu
sanyu.*

Davidi khaawerya owela; owo aari vathi v'ephome yooyeehiwa y'amwaanyompe, ni ipuri, ni ipwittipwitthi. Masi vano owo aaniwerya ohihimuwa; owo aari vathi v'Ephome

ya Pwiya Yesu. Okhala wira awo anaakhula paahi Ephome eyo okathi Eyo yaarow'aya orwa ni owerya. Okathi Ephome ya Kristu eruuly'aya ni owerya, othene ale yaakhwiye mwa ocaleliwa wooreera, yaahihimuwa, ti yeeyo, nto yaahiwela Movuwani.

201 Vano nwiriyane.

Tivo atthu othene a Isarayeli esuweleke . . . (Nwiriyane ela.) . . . wira Muluku oomukhalaha Yesu yoowo, nyuwo . . . mmukhomenly'anyu, Pwiya ni Kristu.

Ankhi iyo? Owo Mutthu a neeraru a oraaru, wala Owo ti oraaru wothene? Owo ti omalela wothene wa oMuluku, mw'erutthuni.

202 Khiivo etthu ene eyo ntoko aMuluku araru: Muluku Tithi, Muluku Mwaana, ni Muluku Eroho Yowarya. Eyo hata khekhanle muhina mwa Soolempwa, hata nipuro. Khekhanle hata nipuro. Khanivo hata nipuro etonko aya orummwa opatisa, "Mwa nsina n'Atithi, ni mwa nsina na Mwaana, ni nsina na Eroho Yowarya," hata nipuro nimoso muhina mwa Soolempwa. Eyo eyaaminelo y'eKatolika, nave kehiyo ya ekereja Prustante. Miyo kininvekela mutthu ti mutthu akoonihe Yoolempwa emosa vaavo mutthu ti mutthu otonko awe opatisiwa enamuna ekina woohikhala mu Nsina na Pwiya Yesu Kristu. Murwe, mukoonihe, nto kinoohela nipawe ottuli waka, "Namirima miili, ni profeta oowootha, mwixuttihi oowootha," kinookhumela mphironi. Khiivo etthu ene eyo. Khaavo hata mutthu otonko opatisiwa enamuna yeeyo. Eyo eyaaminelo y'eKatolika, ni kuhiyo mwixuttihi w'ePrustante.

203 "Matewu 28:19," nyuwo muniira, "Yesu iirale, 'Murowe mulaponi mothene, mwawixuttihe atthu a maloko othene, mwaapatisaka mu Nsina n'Atithi, Mwaana, ni Eroho Yowarya.'" Eyo ti yoolikana.

Masi kahi, "Mwa nsina n'Atithi, nsina na Mwaana, nsina na Eroho Yowarya." *Nsina* n'Atithi, *Nsina* (kahi masina), n'Atithi . . .

Tithi khanihiyo nsina. Akavi ansuwela yeeyo? Axitiithi akavi ari mu? Nvenxe matata. Aana akavi ari mu? Nvenxe ntata. Atthu akavi ari mu? Nvenxe matata. Vaareera. Vano, nsina nanyu ti pani? Kahi tiithi, mwaana, nnakhala mutthu.

204 Muthiyana mmosa aahikiirela emaara emosa, yoowo aari a oraaru vanci-ene, owo khwira, "Munna Branham, masi Eroho Yowarya nsinaa."

205 Miyo khwira, "Eroho Yowarya kahi nsina. Eroho Yowarya t'Ile ekhanly'aya. Eyo Eroho Yowarya." Kahi nsina; eyo t'Ile ekhanly'aya. Miyo ka mutthu, masi nsina naka khanihiyo mutthu. Nsina naka ti William Branham. Tivo, vakhala wira Owo ohimmye wira, "Murowe, mwawixuttihe atthu a maloko othene,

mwaapatisaka mu *Nsina* n'Atithi, ni na Mwaana, ni na Eroho Yowarya."

206 Vano Petru, mahiku muloko ohoolo waya, khwira, "Murukunxe murima!" Vano, va, nwiriyane ela.

Nto vaiwaly'aya yeela, murima waahaariipa vanci-ene, khumukoha Petru ni...n'arummwa akina, Alopwana n'axinna, nto niireke-ni?

Vano Petru aahiwiirela, Murukunuxe murima, khula mmosa a nyuwo, nto mpatisiwe mu nsina na Pwiya Yesu Kristu wira muleveleliwe itampi sanyu, nto munimwaakhela yoovaha ya Eroho Yowarya.

207 Vano Petru airale etthu Yesu aamuhimenry'awe wira ahiire? Owo khaatikinihiwe. Hiyo ti nitikinihiwe.

208 Miteko 2:38, aYuta yaapatisiwe mu *Nsina* na pwiya Yesu Kristu, esamihiwaka.

Mwa Miteko, kapiitulu 8, ninniphwanya wira Filipe aahirowa khwaalaleerya aSamariya, khwaapatisa mu *Nsina* na Pwiya Yesu Kristu, aSamariya.

Mwa Miteko 10:49, Petru aahaaruma Amalapo wira epatisiwe mu *Nsina* na Pwiya Yesu Kristu.

209 Paulo, Miteko 10:5, "Owo aahivira mmittettheni sa wEfeso, khwaaphwanya awiixutti." Awo yaari awiixutti aPatista; othene aya, yaari, aPatista. Awo yaarukunxale murima vathi va mulaleyi mmosa muPatista aihaniwa a—a moone, Apolo. Ni owo aari mulaleyi muPatista, "Ni aamooniherya ni Bibilia wira Yesu aari ti Kristu."

Paulo khwira, "Muhaakhela Eroho Yowarya okhuma okathi mwaaminny'anyu?"

210 Awo khwira, "Hiyo khanisuwenle sinto yookhala Eroho Yowarya."

211 Khwira, "Vano mpatisiwe sayi?"

212 Awo khwira, "Hiyo nipatisiwe ni mulopwana mmosaru yoole omupatinse Yesu, vantthiyani va maasi iwe. Eyo ti yoophiyera."


213 Paulo khwira, "Eyo khenvar'etthu vano. Muhaana opatisiwa, emaara ekina." Nto Paulo aahaaruma opatisiwa, emaara ekina, mu *Nsina* na Pwiya Yesu Kristu. Khuwiixaatherya matata, vano Eroho Yowarya yaahaakhuruwela. Voolikana. Ayo, mulopwana.

Onookhala Waarya okathi wa makaaripi,
Ephiro ya Movuwani vekeekhai
munoochwanya;

Ephiro ya mmaasini, wookhala Waarya olelo,
 Oovithiwa mwa Nsina nooreerexa na Yesu.
 Amiravo n'atokweene, muttharuwe itampi
 sanyu sothene,
 Eroho Yowarya vekeekhai enookela;
 Waarya wa makaaripi ohoorwa,
 Ekeekhayi wira Muluku ni Kristu ari
 Mmosaru.

²¹⁴ Ti yeeyo Bibilia ehimaly'awe. Ti yeeyo. Ola p'ukathi, ola
 p'ukathi nrin'ahu orukunxa murima.

²¹⁵ Mwiire, mukileele mwalikana vale, nipuro noopatisa. Ni
 ninoo . . . [Munna mmosa oniira, "Noolikana."—Mol.] Moolikana?
 Vaareera, sikhunliwe ikurtiina.

²¹⁶ Vano, Apwiya yooreeriheni vano, okathi munna
 oneettihery'awe opatiiso. Othene munniwerya woona va?
 [Munna Neville onaapatisa alipa-oowaamini—Mol.] 

AHEPERI, EKAPITULU YA NENLI ² EMK57-0825E

(Hebrews, Chapter Two ²)

ITTHARANELO YA ELIIVURU YA AHEPERI

Mutthak'ola wa Munna William Marrion Branham, opaceryawene olaleeriwe ni Enkelesi Ettiminku ohiyu, mahiku yeettaka 25 mweeri w'Agosto, 1957, oBranham Tabernacle oJeffersonville, Indiana, wAmerika, okuxiwe wo okaravariwa mufitani ya makineti khulempwa wothene ni nttaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2021 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Olopolo mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitemihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhanelle, xontte mulavule ni:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org